

## 經文：使徒行傳 8:26-40

舊年引用使徒行傳講道 ê 時，bat 提起講作者路加 kā 使徒行傳前半段寫作彼得行傳，後半段寫作保羅行傳，腓利是夾 tī 中央 ê 一段個人傳福音 ê 故事。使徒行傳卻特別記載腓利個人 ê 傳道事蹟。新約內底有兩個腓利，其中一個是十二使徒之一。另外一位就是今 á 日經文所講 ê 腓利，伊是教會初期互選出來管理伙食 ê 執事之一。伊 m̄-nā 盡忠作執事，kō gâu 傳道，所以聖經稱伊作傳福音 ê 腓利 (21:8)。Tī 司提反 hōng 害了後，教會大大受 tloh 迫害，學生四散，腓利散到撒馬利亞去，向當地 ê 人宣講基督 ê 事(8:5)。接落來就是 chit 段故事，伊四界傳道，後來寄腳該撒利亞。伊 ê 厝 mà 成做熱誠接待使徒 ê 所在，親像保羅一陣人 bat 去伊 ê 厝住 kú ah 工。伊有四個查某子 lóng 是聖潔守身 ê 女子，有上帝同在也會曉講預言 (21:8-9)，可見腓利對子兒宗教教育 ê 重視，伊 m̄-nā 是成功 ê 傳道者，mà 是一位模範 ê 父親。Tùi 今 á 日 ê 經文咱同齊來思考腓利成功 ê 因素：

1. 有智慧：耶穌教示咱要疼人，疼人親像自己。總是咱有愛心也 tiòh ài 有智慧。愛心無智慧就容易互人利用，愛心無公義就會濫滲，教會 mà 會混亂。所以咱要學會曉斟酌。我 bat tú-tiòh 一位司機，伊 ê 頭家真有傳道 ê 使命，常常邀請國外靈恩派 ê 牧師到台灣舉辦特會。特會期間伊需要隨時等候接送眾牧師，總是伊 m̄-bàt 參加特會，ka nā tī 外面等，我問伊為什麼？伊講：chiah-ê 牧師，只要我 ê 頭家 tī-teh 就對我真客氣，若頭家無 tī-teh 就 kā 我當作下人，從來無 bat 有好面色，chiah-ê 人講 ê 一套作 ê 一套，我 iáu 需要入去 mah? 所以伊 ê 頭家雖然有傳道 ê 使命，可惜無認 bat 人。腓利本是選出來管理伙食 ê 執事，因為伊盡心盡力服事上帝 kap 服事人，伊 tī 上帝 ê 宣教計劃內底有緊重要 ê 角色。伊克服種族歧視，將福音傳 hō 外邦 ê 撒馬利亞人，成做頭一位到猶太地區以外傳福音 ê 宣教士。腓利除了有美好 ê 生活見證，根據第 6 章 3 節伊互選為執事 ê 條件是 ài 有名望、受聖靈充滿、koh 有智慧，雖然聖經中無特別提起伊 jòa 有智慧，總是 tùi 伊 ê 事工 thang 有看出伊 ê 智慧，譬如講：伊對慕道友真用心，一句話就掠著重點，對聖經 mà 真熟，詳細解經，太監一表示有信 ê 意思，腓利馬上為伊洗禮，莫怪伊傳福音會成功。
2. 迫害 ê 環境：早期 ê 教會因為受迫害向外發展，起頭彼得 kap 約翰為 tiòh 傳道來入監(CH.4)，落來使徒 hòng 抓 (5:18)，司提反活活互石頭 phah 死(7:60)，續落去，猶太人積極迫害基督徒，致到基督徒 bē-sái tī 猶太人中間傳福音，tùi án-ne 福音跟 tloh 門徒四散，開始 tī 猶太 kap 撒瑪利亞地區傳開。觀察台灣基督長老教會 ê 教勢，tī 50 年代倍加運動快速成長，到 70 年尾 ê 時就慢落來，總是 tùi 1979 年美麗島事件以後，國民黨 ê 加強迫害，長老教會 tī 林氏凶宅成立義光教會，高俊明牧師用殉道 ê 精神，寫好遺書，平靜入監。Tī 這艱難 ê 情況下面，信徒卻穩穩 ê 增加。後來高牧師 hòng 放，社會漸漸開放，迫害減少，信徒反轉年年流失。當今韓國是基督徒比例 siōng 高 ê 國家之一，原因是韓戰以後，真 chē 韓國人互共產黨迫害，逃到南韓接觸福音成做基督徒。莫怪教父特土良講：殉道者 ê 血是福音 ê 種子。早期信徒遇 tloh 迫害、苦難、移遷、是痛苦 ê 事實，總是腓利卻 tī chit 波大迫害中看到一 ê 傳福音 ê 機會，tùi án-ne 伊將福音傳 hō 撒瑪利亞人。後來伊有機會向衣索匹亞 ê 太監傳福

音 mà 是因爲逃避迫害 chiah ē-tàng 達成 ê。設使耶路撒冷教會無受 tiòh 迫害，有可能腓利 ê 一生只是一 ê 管理伙食 ê 執事，福音 ē-tàng 傳到衣索匹亞沒，就 m̄ 知 ah。

3. 聖神引| chhōa：聖神 tī 五旬節降臨了後，使徒行傳真多擺記載聖神降臨 ê 事。當腓利 tī 撒馬利亞宣揚基督 ê 時 chūn，聖神 mà hō 伊行醫病趕鬼 ê 神蹟，來證明耶穌是基督 kap 伊 ê 道，án-ne 撒馬利亞城內充滿 tiòh 喜樂，有真 chē 人 lóng 信了 (8:6-8)。主耶穌經過撒馬利亞，tī 井邊 kap 婦人談道 ê 時，mà 有真 chē 人信伊 (約 4:39-42)；腓利跟 tòe 基督 ê 腳步，應驗主耶穌所講 ê：「信我 ê 人，我所行 ê，伊 beh 行伊；就比 chiah-ê 事 khah 大 ê，亦 beh 行伊；因爲我歸 tī 父。」(約 14:12) m̄-khu，chit 時聖神卻愛伊放下事工 kap 成就，行過曠野到南方 ê 迦薩 (8:26)。腓利雖然看 bē-tiòh 前景，猶原緊緊向南去，只是 beh 拯救一位外邦 ê 太監。當伊看 tiòh 太監 ê 大車時，聖神 koh 一 pái 對腓利講：「你去！進前去近 óa hit 張車。」tùi án-ne 腓利緊走過去，掠著機會傳福音，可見伊是一位決斷、有勇氣、順從聖神 ê 人。Tī 咱生活中，有真 chē 時 chūn 咱是照家己 ê 意思來做事，甚至爲 tiòh 滿足私慾故意閃避聖神 ê 引導。親像：舊約先知巴蘭 ê 故事。摩押 ê 國王巴勒，爲著勾結巴蘭，請伊咒詛以色列人，tùi án-ne 派人 thèh-tiòh 金銀去 chhōe 巴蘭，巴蘭無拒絕，反轉求告上帝。上帝對巴蘭講：「你 m̄-thang kap in 去，也 m̄-thang 咒詛 chit-ê 百姓；因爲 in 是得 tiòh 福氣 ê。」tùi án-ne 巴蘭 kā 使者講：「耶和華不容我 kap lín 去。」(民 22:18-19) 無久，摩押王巴勒又一擺差遣奴僕提著比以前 koh-khah 尊貴 ê 財物來引誘巴蘭。巴蘭忍 bē-tiâu 又一擺求問上帝，巴蘭 tī tī 強求，上帝就放伊去 la。雖然伊所騎 ê 驢子 mà 警告伊 (民 22:22-35)，總是巴蘭 ê 心 hō 錢買去啊。事實上，巴蘭是家己 ê 意思，m̄ 是上帝 ê 意思。伊一心想 beh kap 巴勒 ê 使者同去，上帝就 hō 伊去。想看 m̄i，設使咱堅持 beh 作一件事，主可能就 hō 咱去作，總是結果 ài 咱家己去負責任。腓利實在有智慧，伊藉 tiòh 環境，明白上帝 ê 旨意，伊摸著上帝 ê 心意，tī 彼得 iáu 無看 tiòh 傳福音 hō 外邦人 ê 異象 chìn 前，伊已經知影上帝 ê 心意，藉 tiòh 聖神特殊 ê 引| chhōa，認識到福音 m̄ 是單單 hō 耶路撒冷 ê 猶太人，mà 是 hō 世界上所有 ê 人。

今 á 日福音傳到台灣已經超過 140 年，總是是台灣只有 bô 到 4% ê 人相信主耶穌。長期以來，大部分 ê 教會 kah 無問家己 ê 使命是什麼？教會必須重新界定家己 ê 使命。尤其是傳統教會 kah 重視自我成長，kah 無有對外傳福音 ê 勇氣。近來咱 ê 長執會有共識 beh 將福音傳 hō 同鄉，咱一直設計節目或是查經 hō 同鄉同齊來參加。有執事提醒咱 siōng 好 tī 自稱 ê 時僅量 m̄i 講「阮教會」，免得互同鄉誤認咱有意 beh 區分 in。咱 ài kā 同鄉看作有需要 ê 厝邊，只是 iáu 無 chhōe-tiòh 主 ê 恩典。約翰衛斯理講：「我 kā 全世界看作是我 ê 教區，無論 tī 什麼所在，我 lóng 願意幫助聽 ê 人宣告上帝救贖 ê 好消息，這是無 thang 閃避 ê 責任。」希望咱 mà kā 波士頓看作是咱 ê 教區，用咱 ê 好見證繼續 kap 同鄉作朋友，有耐心又用心、有智慧來引領 in，hō 福音栽種 tī in 心內，ng 望有一工 ē-tàng 結果子，hō 主來收割。